

BELGICA NOVA.

idque æstate, quum propius ad mare piscandi gratia accedunt. Alii fixas sedes habent, domiciliaque furni effigie, tignis & corticibus arborum desuper contexta, adeo capacia, ut pluribus familiis sufficiant. Supellex illis tenuis & rara, storea & disci lignei, secures barbara industria facta è duris silicibus, tubuli quoque, è quibus tabacci fumum hauriunt, ex iisdem silicibus haud inconcinne cavati, ut mirum sit, quo pacto in tanta ferramentorum inopia tales ab ipsis sculpi possint. divitias neque appetunt, neque norunt.

Cæterum nullus ipsis religionis sensus, nulla Dei veneratio: diabolus quidem colunt, sed non tam solenniter neque certis ceremoniis, ut Africani faciunt. hunc suo idiomate vocant *Menutto* vel *Menetto*; & quicquid mirabile est & captum humanum videtur superare, id similiter vocant *Menetto*; eodem plane modo, quo Canadenses *Oqui* voce utuntur.

Nulla ipsis Politia forma, præterquam quod præfectos suos habeant, quos *Sackmos* & *Sagamos* vocant, qui fere sunt familiarum principes, nam raro cognationis unius limites excedunt. Sunt autem, ut plerique barbari, suspiciosi & meticulosi; imprimis autem vindictæ cupidissimi; mutabiles: verum si humanius tractentur, hospitales & ad obsequium prompti, exiguaque mercede operam suam addicunt & longissima quoque itinera brevi tempore absolvunt, majori fide quam à tam barbaris hominibus jure quis expectet. neque dubium est, consuetudine Christianorum & urbanis moribus & religione imbui posse, præsertim si colonia huc deducerentur hominum bene moratorum, qui & obsequiis illorum uterentur absque violentia aut contumelia, & vicissim illos ad veri Dei cultum & civilem conversationem sensim assuefacerent.

